

全唐诗卷三百三十一

卷 331_1

【享太庙乐章】段文昌

肃肃清庙，登显至德。
泽周八荒，兵定四极。
生物咸遂，群盗灭息。
明圣钦承，子孙千亿。

卷 331_2

【题武担寺西台】段文昌

秋天如镜空，楼阁尽玲珑。
水暗馀霞外，山明落照中。
鸟行看渐远，松韵听难穷。
今日登临意，多欢语笑同。

卷 331_3

【晚夏登张仪楼呈院中诸公】段文昌

重楼窗户开，四望敛烟埃。
远岫林端出，清波城下回。
乍疑蝉韵促，稍觉雪风来。
并起乡关思，销忧在酒杯。

卷 331_4

【还别业寻龙华山寺广宣上人】段文昌

十里惟闻松桂风，江山忽转见龙宫。
正与休师方话旧，风烟几度入楼中。

卷 331_5

【奉陪段相公晚夏登张仪楼】姚向

秦相驾群材，登临契上台。
查从银汉落，江自雪山来。
俚曲亲流火，凌风洽小杯。
帝乡如在目，欲下尽裴回。

卷 331_6

【和段相公登武担寺西台】姚向

开阁锦城中，馀闲访梵宫。
九层连昼景，万象写秋空。
天半将身到，江长与海通。
提携出尘土，曾是穆清风。

卷 331_7

【和段相公登武担寺西台】温会

桑台烟树中，台榭造云空。
眺听逢秋兴，篇辞变国风。
坐愁高鸟起，笑指远人同。
始愧才情薄，跻攀继韵穷。

卷 331_8

【奉陪段相公晚夏登张仪楼】温会

危轩重叠开，访古上裴回。
有舌嗟秦策，飞梁驾楚材。
云霄随风到，物象为诗来。
欲和关山意，巴歌调更哀。

卷 331_9

【和段相公登武担寺西台】李敬伯

台上起凉风，乘闲览岁功。
自随台席贵，尽许羽觞同。
楼殿斜晖照，江山极望通。
赋诗思共乐，俱得咏诗丰。

卷 331_10

【奉陪段相公晚夏登张仪楼】李敬伯

层屋架城隈，宾筵此日开。
文锋摧八阵，星分应三台。
望雪烦襟释，当欢远思来。
披云霄汉近，暂觉出尘埃。



卷 331_11

【奉陪段相公晚夏登张仪楼】姚康

登览值晴开，诗从野思来。
蜀川新草木，秦日旧楼台。
池景摇中座，山光接上台。
近秋宜晚景，极目断浮埃。

卷 331_12

【和段相公登武担寺西台】姚康

松径引清风，登台古寺中。
江平沙岸白，日下锦川红。
疏树山根净，深云鸟迹穷。
自惭陪末席，便与九霄通。

卷 331_13

【礼部试早春残雪】姚康

微暖春潜至，轻明雪尚残。

银铺光渐湿，珪破色仍寒。
无柳花常在，非秋露正团。
素光浮转薄，皓质驻应难。
幸得依阴处，偏宜带月看。
玉尘销欲尽，穷巷起袁安。

卷 331_14

【赋得巨鱼纵大壑】姚康

水府乘闲望，圆波息跃鱼。
从来暴泥久，今日脱泉初。
得志宁相忌，无心任宛如。
龙门应可度，蛟室岂常居。
掉尾方穷乐，游鳞每自舒。
乘流千里去，风力藉吹嘘。

